

8. In pueritia litteris incumbendum, in juventute sensuum desideriis obtemperantium, in senectute anachoretarum vitam degentium, denique meditationis vi corpus relinquentium;

9. RAGHUIDARUM stirpem celebraturus sum, quamquam vocis meæ vis est exigua; at illorum virtutibus, quæ ad aures meas pervenerunt, ad hanc temeritatem compulsus.

10. Hanc stirpem boni audire velint, virtutum vitiorumque arbitri: nam igne probatur auri puritas sive impuritas.

11. MANUS, VIVASVATIDES appellatus, honorandus inter sapientes, regum primus fuit, sicut vox mystica OM prima est in versibus sacris.

12. In pura ejus progenie natus est purior DILÍPAS, regum luna, veluti luna nata in oceano lacteo.

13. Præditus lato pectore, taurinis humeris, *sálæ* arboris instar procerus, longisque lacertis, erat ille quasi *Kshatriyorum* virtus, induta corpore actionibus suis idoneo.

14. Corpore suo, omnibus altiore, quod vigore omnibus antecellebat, omnesque robore vincebat, stabat ille, *Meruis* instar terram exsuperans.

15. Formæ ejus consimilis erat intelligentia, intelligentiæ studia, studiis similes erant conatus ejus, conatibusque similes eventus.

16. Virtutibus suis regiis, æque tremendis atque suavibus, civibus suis insuperabilis erat simulque desideratus, sicut oceanus est bestiis suis atque margaritis.

17. Ejus cives, hujus aurigæ rotarum vestigiis ingredientibus, ne lineam quidem deflectebant de via inde a MANUE calcata.

18. Non nisi civium salutis causa ille tributum iis imperabat: nam millies eam redditurus, aquam attrahit sol.

19. Exercitus non nisi comitatus loco ei serviebat, duæ vero res ad incepta peragenda: mens in libris haud perturbata nervusque in arcu intensus.

20. Quamquam deliberationes suas occultabat, atque indicia externa animique motus celabat, conatus ejus ab eventu erant colligendi, sicut vitæ prioris recordationes.